

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Allah, dž.š., nam u Kur'anu poručuje: „**Gdje god bili, smrt će vas naći, pa makar bili i u kulama visokim...**“ (En-Nisa', 78.)

Braćo i sestre, ovaj naš život na Dunjaluku je samo jedan ispit, odnosno priprema za stvarni život. Svaki čovjek mora umrijeti i pred Allaha donijeti samo svoja djela, od kojih ovisi hoće li u vječnosti biti sretan ili ne. Današnja hutba bi trebala, ako Bog da, da nas podstakne na činjenje što više dobrih djela, kako bismo pred Allaha, dž.š. stali svijetlih lica.

Ashab Berra b. Azib, r.a., kaže da je Poslanik, s.a.v.s., rekao: „**Zaista, na kraju dunjalučkog života, robu vjerniku dolaze meleki s neba, lica sjajnih poput sunca. Sa sobom nose ćefine i balzame iz Dženneta i sjednu oko njega dokle dopire pogled. Zatim dolazi Melek smrti, sjeda pored njegove glave i kaže: 'O ti dobra dušo, izadi uz Allahov oprost i zadovoljstvo!' I ona izade kao kap iz ispijene čaše, a meleki je odmah stave u ćefine i balzam i ona zamiriše poput**

miska, te se onda zapute k nebu. Kad god naiđu na skupinu meleka, oni upitaju: 'Tko je ta dobra duša?' A ovi odgovaraju: 'To je taj i taj.', nazivajući ga najljepšim imenima, kojim su ga ljudi zvali na Dunjaluku, i tako sve dok ne stignu do sedmog neba. Tada im Uzvišeni Allah kaže: 'Upišite mog roba u Illijun (Boravište čestitih duša), i vratite ga u zemlju! Ja sam ga stvorio od zemlje, u nju ću ga vratiti i iz nje ponovo izvesti!' Zatim se njegova duša vrati u tijelo i dolaze mu dva meleka, koji sjedaju pored njega i pitaju: 'Tko ti je Gospodar?' On odgovori: 'Allah, dž.š.' 'Koja ti je vjera?' On kaže: 'Islam.' 'Tko je onaj koji ti je poslan?' On odgovori: 'Allahov poslanik.' 'A kako znaš to?' On veli: 'Učio sam Kur'an i čvrsto u njega vjerovao.' Zatim će se čuti glas sa neba: 'Moj rob je istinu rekao, odjenite ga džennetskom odjećom i otvorite mu vrata Dženneta!' Pa mu onda dolaze lijepi mirisi iz Dženneta, kabur se proširi dokle dopire pogled i dođe mu čovjek lijepog lica, odjeće i mirisa, pa mu kaže: 'Raduj se onome što te čeka, ovo je dan koji ti je obećan!' 'A tko si ti, koji mi donosiš dobrotu?' - pita vjernik, a onaj odgovara: 'Ja sam tvoja dobra djela.' A vjernik onda kaže: 'Gospodaru moj, daj što prije nastupi Sudnji dan!' A nevjerniku na kraju dunjalučkog života dolaze

meleki s neba, crnih lica, noseći sa sobom najgrublje platno i sjednu pored njega dokle dopire pogled, a onda dolazi Melek smrti i sjedne pored njegove glave i kaže: 'O ti zla dušo, izadi uz Allahovu srdžbu i gnjev!' Zatim mu čupaju dušu, kao greben kroz mokru vunu, a potom je stave na grubo platno, pa iz nje izade najgori miris lešine. Zatim se upute ka nebu. Kad god naiđu na skupinu meleka, oni upitaju: 'Tko je ta zla duša?' A ovi odgovaraju: 'To je taj i taj.', nazivajući ga najgorim imenima, kojim su ga ljudi zvali na Dunjaluku, i tako sve dok ne stignu do zemaljskog neba. Potom zatraže da im se otvore nebeska vrata, ali se ona ne otvaraju.' Potom je Poslanik, s.a.v.s., proučio ajet: „Onima koji budu Naše ajete poricali i prema njima se budu oholo odnosili – kapije nebeske se neće otvoriti, i prije će debelo uže kroz iglene uši proći, nego što će oni u Džennet ući. Eto tako ćemo Mi grješnike kazniti.“ (E1-E'araf, 40.)

Potom Allah, dž.š., kaže: 'Upišite ga u Sidždžin (Boravište loših duša) na zemlji, njegova duša bit će odbačena!' Poslanik, s.a.v.s., je onda proučio ajet: „Budite iskreno Allahu odani, ne smatrajte nikoga Njemu ravnim! A onaj tko Allahu širk bude činio, bit će kao onaj koji je s neba pao i koga su ptice razgrabile, ili onaj koga je

vjetar u daleki predio odnio.“ (El-Hadždž, 31.)
Potom njegova duša bude vraćena u tijelo i dođu mu dva meleka, posade ga da sjede i upitaju: 'To ti je Gospodar?' On odgovara: 'Ah, ne znam.' 'Koja ti je vjera?' On veli: 'Ah, ne znam.' Tada će čuti glas sa neba: 'Moj rob je slagao, obucite na njega džehennemsku odjeću i otvorite mu vrata Džehennema!' Do njega onda stigne džehennemska vrelna i žestina, a kabur mu se stijesni tako da mu rebra jedna kroz druga prođu. Potom mu dođe čovjek ružnog lica, odjeće i mirisa, koji mu veli: 'Raduj se onome što te čeka, ovo je dan koji ti je obećan!' Zli čovjek onda upita: 'Tko si ti, koji mi donosiš zlo?' A ovaj mu odgovara: 'Ja sam tvoja loša djela.' Potom zli čovjek rekne: 'Gospodaru, ne daj da bude Sudnji dan!'"

Poslušajte govor jednog od najpoznatijih učenjaka našeg vremena, šejha Selmana el-Aude, koji je obraćajući se muslimanima na jednoj dženazi, između ostalog, rekao sljedeće: „Smrt nije kraj. To je prelazak sa jedne obale na drugu; iz jednog svijeta u drugi svijet. Umrla osoba odlazi svome Gospodaru, a On je prema nama milostiviji od nas samih. Prisjećanje smrti, ako je odmjereno, nije ništa negativno. To nam pomaže da bolje

iskoristimo život, da prebrodimo nedaće i opraštamo.

Smrt me opominje na tri stvari: Prva, s čime (kakvim djelima) ću sresti Allaha? Druga, po čemu će me pamtiti ljudi? I treća, kako da živim sretan i produktivan život?“

Braćo i sestre! Nemojmo odlagati činjenje dobrih djela! Svaki dan koji prođe, ne vraća se više nikada. Mi smo svake sekunde bliži smrti i povratku svome Gospodaru, koji nam neće dati priliku da po drugi put živimo na Dunjaluku. A smrt vrebava i mladog i starog, i bolesnog i zdravog. Danas smo tu, a sutra već tamo. Dunjaluk ostaje, a mi idemo dalje sa svojim djelima. I dobrim i lošim. Uložimo sve napore i svo svoje vrijeme koje je pred nama da priskrbimo što više dobrih i što manje loših djela. Molim Uzvišenog Allaha da nas uputi na Pravi put, na Put koji vodi Allahovom zadovoljstvu i Džennetu!

Amin!

Prethodne hutbe potražite na našoj stranici: www.medzlis-split.org

Pripremio: Vahid ef. Hadžić
Split, 17.02.2017.

ISLAMSKA ZAJEDNICA U HRVATSKOJ
MEDŽLIS ISLAMSKE ZAJEDNICE SPLIT

**PRIPREMIMO SE
ZA SUSRET S
GOSPODAROM
SVJETOVA**

468